

Lara Battisti neva presidenta de l'Istitut Ladin de Fascia

La Jonta provinzièla à aproà la delibera de nomina del Consei de la “majon di fascegn”. Critiches te Fascia su la nomina de la Region

L'è Lara Battisti, avocata de 38 egn da Pera e Conseiera de Procura del Comun General, la neva presidenta de l'Istitut Cultural Ladin.

La é stata nominèda da la Jonta de la Provinzia de Trent, che fà ence nominà tel Consei de Aministrazion de l'ICL Francesco Dellantonio e ratificà la nomines proponetes da altra istituzions: Carlo Deluca e

Andrea Rizzi resperivamenter per la maoranza e la mendranza del Consei del Comun General e Marica Rìz en raprezentanza de la Region Trentin Sudtirol. En cont de la modalitè de chesta nomina da pèrt de la Jonta regionèla l'è stat palesà critiches te Fascia.

La Jonta provinzièla à nominà ence la revisora di conts Mirella

Spagnolli, che desche dut l Consei la restarà en cèria fin a la fin de la legislatura.

Del Consei de l'Istitut fèsc pèrt ence Lodovica Dioli en raprezentanza de la Comision Culturala de l'ICL, che à tempes de mandat desferenc e la resta en cèria amò per 2 egn. lè

— De più a piata 7

Lara Battisti a cef de l'Istitut Ladin

La Jonta provinziela à nominà l'Consei de Amministrasion de la "majon di fascegn"



Lara Battisti.

Lara Battisti l'è la neva presidenta de l'Istitut Cultural Ladin de Fascia. Sia nomina è stata deliberada ai 3 de mè da la Jonta de la Provincia Autonoma de Trent, ensema con chela de Francesco Dellantonio Tassin. La Jonta à ratificà duc i componenc del Consei de Amministrasion de l'ICL conferman i inomes portè dant dal Comun General e da la Region Trentin Sudtirol.

L'Consei General aea designà ti meis passè Carlo Deluca per la maoranza e Andrea Rizzi per la mendranza; la Region à nominà enveze i meis passà Marica Riz.

Critiches per la nomina de la Region

La nomina de la Region à soscedà polemiches te val, no tant per l'inom cernù ma per la modalità. La delibera disc che l'era una declarazion de desponibilità, chela de Matteo Pioner, e che a l'ultim moment se à jontà ite chela de Marica Riz, che la è stata nominada. Pioner, dozent de economia a Trent, l'aea n curriculum de aut livel e l'aea jà portà inant a na vida positiva e competenta sie ruol tel CdA de l'Istitut Ladin te l'ultim mandat, donca l fat che l sie stat trat endò a l'ultim menut à soscedà critiches e dubies, ence percheche sie inom era stat prejentà da l'assessor a la mendranza linguistiches Manfred Vallazza, che te chela scontrèda de Jonta l mencèa.

Da l'Assessorat i à spiegà che da dotrei setemènes ge vegnia domanà al conseier ladin Luca Guglielmi de portèr dant n inom, ma senza egi. En ocajon de la vijita de Vallazza te Fascia l'è vegnù fora l besegn de nominèr i raprejentant al più prest e ence la desponibilità de Pioner, che era stat nominà jai 5 egn te l'Istitut apontin desche raprejentant de la Region. Demò la sera dant da la scontrèda de Jonta, a delibera jà enjignèda, Guglielmi e l'assessor regionel Claudio Cia i à fat prescion per meter ite n "sie" inom. Per via de zompes condizions meteo Vallazza no è ruà a la scontrèda de Jonta, olache l'è stat nominà Marica Riz. Zenza Vallazza, i trei raprejentanc de la Provincia de Trent te la Jonta (Fugatti, Cia e Leonardi) i aessa dut un abù la maoranza-à despiegà l secretèr de l'assessor-ampò se i raprejentanc trentins è a una per na nomina che revèrda sia provinzia no l'era la volontà de jir en contrast per sostegnir l'inom che nos considraane mior. No l'è stat donca nescuna valutazion del curriculum,

ajache se tratèa de na nomina biot politica.

Endespès ampò che, demò per la volontà de imponer n inom leà politicamenter, no vegne tegnù cont de la competenzes de la persones.

La prioritàdes de la presidenta

Lara Battisti de 38 egn da Pera la è te la politica dal 2010, canche la è doventada Conseiera del Comun de Poza. Ancheondi la è Conseiera de Procura del Comun General con delega a bilanz, raporc istituzionèi e valiva oportunitèdes, e la era jà tel CdA de l'Istitut Ladin presciapoch da n an, canche l Comun general l'aea nominada al post de Luca Guglielmi, che aea dat la demiscions.

La è avvocata (laureèda con na tesi su la tutela giuridica di ladins de Fascia) e la laora a Rorei; per via de la desvaliva encèries la se spartesc anter Rorei e Fascia e ades la peissa de vegnir de retorn te val.

Enscin ades tel CdA de l'Istitut la se à cruzià de aprozions del bilanz e adempimenc amministratives, ades desche presidenta la se met dant dotrei prioritàdes.

"L'è besegn de studiar fora n model amministratif che posse ge dar a l'Istitut maor autonomia. Defat esser n ent funzional de la Provincia garantesc segurezza, ma l porta ence limic burocratiche e l'obligh de star sot a diretive che no tegn cont de le peculiarità de nosc teritorie. Se cogn troar na strada tel recognosciment de la mendranza ladina aldò di prinzipies de territorialità e sussidiarietà.

Ge vel ence endrezar l passaje canche jirà en penscion l diretor, che l'è na fegura n muie raprejentativa e l'è stat na lum per n muie de egn. Segur se aessa besegn de zachei leà a nosc teritorie, perché demò chi che cognosc e vif tel teritorie i pel arseguar le politiche e attività miore da portar inant.

Dapò me piajessa da persona più jona raprejentar l pont generazional anter l'identità ladina storica e chela che vegn vivuda di per di. L'Istitut à fat n lurier emportant per i regoi de noscia storia, ma cognon seghitar a la sriver, acioche tel davegnir i posse jir inant a la lejer.

Me è proponet desche presidenta perché peisse che sie de utol na persona jona te chest moment che le neve generazion le stenta a sentir na forta identità ladina."